

## **Karaloukta nütüma Pablo namüin na Chajanakana GALACIA**

*Ashajüshi Pablo namüin na anoujashii  
chakana Galacia*

<sup>1-2</sup> Taya, wane chi Aluwataaushikai nütüma Cristo Jesús, Pablokai anülia, namaa na tawalayuu yaakana tamaa, wasaküin jia anoujashiikana nünain Jesucristo chakana sulu'u tü outkajaaleekalüirua chakat Galacia. Nnojoishi ajütüüshin taya sünain tü a'yatawaakat sütüma wayuu. Na kounejalakana taya nia Jesucristo oo'ulaka chi Washikai Maleiwa oso'ire'etkai naa'in süchikijee ouktaa.

<sup>3</sup> Achuntüshii waya nümüin chi Washikai Maleiwa je nümüin chi Senyotkai Jesucristo süpüla nee'iyatüin na'anasia waneepia jümüin je süpüla naapüinjanain wane anaa jümüin.

<sup>4</sup> Saa'u naa'inreein Cristo tü nüchekakat chi Washikai Maleiwa nüpüleerua, naapajiraain nikii süpüla ouktaa saa'u waainjala süpüla taashinjanain waya suulia müin aka waya naa'in wainma wayuu maa'ulu yaa sünain süchepchiain saainjala.

<sup>5</sup> Anakaja wa'waajüle chi Maleiwakai waneepia süpüla ka'ikat süpüshua sükajee tia. Amén.

*A'wanajaasü süküjia tü nüchikikat chi O'tte'erüikai natüma na ekirajülikana sünain alawaa*

<sup>6</sup> Oponojooshi ma'i taya sükajee ju'ttüinapain sünain oo'ulawaa nuulia Maleiwa chi eenakakai jia sünainjee na'anasia Cristo. Süka jamüin, kapülasü joolu'u jaa'in wane nüchiki chi O'tte'erüikai sulu'u naatain sukuaippa,

<sup>7</sup> wane sümüin suulia tü nüchikikat Cristo chi O'tte'erüikai shiimüinsü taküjapü'ukat jümüin. Eesüja'a süpüla süntüitpain ja'akamüin tia ekirajünnüukat sünain alawaa. Nnojolüitpa jütüjaayaain aa'u ne'e tü shiimüinkat natüma. Je su'wanajaanüitpain nüchiki chi O'tte'erüikai natüma.

<sup>8</sup> Chi eekai nikirajüin wayuu sünain wane nüchiki chi O'tte'erüikai naata suulia tü waküjapü'ukat paala jümüin, ja'itaichi tayain, ja'itaichi niain wane aapiee chajee iipünaajee, e'itaaneechi nia süpüla süsalaa tüü sümaa nükatannüin nuulia Maleiwa süpüla ka'ikat süpüshua.

<sup>9</sup> Shia tü waküjakat achiki jümüin paala wanaa sümaa eepü'üin waya ja'aka, sünain müin wanüiki: Müleka eere wane wayuu eekai nikirajüin jia sünain wane nüchiki chi O'tte'erüikai wane sümüin suulia tü jünoujakat anain, e'itaaneechi nia süpüla süsalaa tüü sümaa nükatannüin nuulia Maleiwa süpüla ka'ikat süpüshua.

<sup>10</sup> Saa'u tashajüitpain jümüin süchiki kasalajanainjatüin namüin naainjala na ekirajülikana sünain alawaa, jiyaawatüinapa taa'u sünain nnojolüin tachajaain süchiki

talateein saa'in wayuu tamaa. Müleka shiimüinreje sünain tachajaain a'waajünaa sütüma wayuu, nnojoishije nüchepchiain taya Cristo. Shia kee'ireeka taa'in talateein naa'in Maleiwa sümaa tü ta'yataainkat nümüin.

*Ounekuushi Pablo süpüla ekirajaa na "gentilekana"*

<sup>11</sup> Tawalayuwaa, anashii müleka jütüjaale saa'u tü nüchikikat Cristo, chi O'tte'erükai, taküjakat sümüin wayuu sünain nnojolüin süle'eru'ujeejatüin shia wayuu.

<sup>12</sup> Chi ekirajakai taya sünain, nnojoishi wayu-uin nia, nia Jesucristo. Nia'a ne'e nümüiwa ee'iyatakai shia tamüin.

<sup>13</sup> Jaapa achikit tü taa'inrapü'ukat wanaa sümaa touchikajaain süchiirua nakuaippa na judiókana, sünain tolojüin nachiirua na anou-jashiikana nünain Jesús sainküin tü outka-jaaleekalüirua shii'iree taja'laje'erüinjatüin tü anoujasükalüirua süpüshua.

<sup>14</sup> Alana'aleeshia ma'i sünain kachiiruain ma'i taa'in sünain tashatüin nakuaippa na tatuushi judiókana noulia wainma na tapüshi wanaawakana amaa touyase.

<sup>15-16</sup> Otta müshia chi Maleiwakai, nüneeküin taya süpülapünaa jemein süpüla to'tte'ennüinjachin nütüma Cristo. Je miyo'upa taya, saa'u anamiain ma'i nia, neenaküin taya süpüla a'yatawaa nümüin. Anasü saa'in nümüin nii'iyatüin chi Nüchonkai tamüin süpüla te'raajüinjachin nia je süpüla taküjainjatüin nüchiki sümüin wayuu nnojotkot judío'in, tü "gentilekalüirua" münakat. Je wanaa sümaa

tia, nnojoishi yootüin taya sümaa wayuu süchiki tü alatakat tamüin.

<sup>17</sup> Je nnojoishi taya o'unüin Jerusalénmüin süpüla taashajaain namaa na Aluwataaushikana e'itaanakana tapülapünaa. O'unüshi taya yaawala sulu'umüin tü mmakat Arabia. Je mapa süchikijee, ale'ejüshi taya Damascomüin.

<sup>18</sup> Je sülatapa apünüin juya, o'unüshi taya Jerusalénmüin süpüla aashajawaa nümaa Pedro. Ni'youshi taya maa aka piama semaana cha'aya.

<sup>19</sup> Otta Santiago, nuwalakai chi Wasenyotsekai, aashajaashi taya nüma'aya. Otta na waneeirua Aluwataaushikana, nnojoliishii tapüla.

<sup>20</sup> (Nütüjaa aa'uchi taya Maleiwa sünain nnojolüin tashajüin joolu'u alawaa jümüin.)

<sup>21</sup> Je süchikijee tia, o'unüshi taya cha'aya sulu'umüin tü mmakat Siria oo'ulaka tü mmakat Cilicia.

<sup>22</sup> Otta na anoujashiikana nünain Cristo sulu'u tü outkajaaleekalüirua sainküin tü mmakat Judea, ja'itaichi nnojolin taya ne'raajüin,

<sup>23-24</sup> na'waajüin Maleiwa sükajee naapüin tachiki, sünain müin sünüiki wayuu: "Olojünapü'üshii waya nütüma chira wayuukai saaliijee tü wanoulakat nünain Cristo. Otta müsia joolu'u, aküjüshi tü nüchikikat Cristo, chi O'tte'erükai, sainküin mmakat süpüshua".

## 2

*Achekünüsü tü nikirajakat anain Pablo natüma na anoujashii judío chakana Jerusalén*

1-2 Müirü aka poloo juya pienchimüin süchikijee chajachin taya Jerusalén, nütütüin taya chi Maleiwakai tachikua chamüin cha'aya süpüla aashajawaa namaa na laülaashiikana na'aka na anoujashii judíokana. Otta Bernabé je Tito, o'unüshii tamaa. Taküjain namüin na laülaashiikana süchiki sukuaippa tü nüchikikat chi O'tte'erüikai tekirajakat anain na gentilekana. Aashajaashi taya namaa sujuuna wayuu, sükajee müin taa'in: "Eesü süpüla shiyouktünüin tü tekirajakat anain natüma na gentilekana müleka shiyouktünüle natüma na anoujashii judíokana".

3-4 Otta wanaa sümaa een waya cha'aya Jerusalén, wanta anainchii wane ekirajülii sünain alawaa na'aka na anoujashii judíokana. Naashin nala wayuukana, che'ojaasü shi'yotoonüin ata tü anoujasükalüirua maa aka sukuaippa wayuu judío. Ekerotshii naya wa'akamüin, sünain wawalayuuin naya naajüin, süpüla ne'rajüin waa'u. Nayoujain waya süka wekirajüin sünain nnojolüin kapülain naa'in Maleiwa wayuu sünainjee ashataa sukuaippa judío süka shiain sünainjee tü naa'inrakat Cristo sümüiwa. Nacheküin süpüla ni'yotoonüinjachin ata Tito, chi gentile wamaajachikai, shii'iree anajiraainjatüin naa'in nümaa Maleiwa naajüin. Shia nachekaka wapüleerua süchepchiainjanain waya nakuaippa na judíokana wachikua. Akaajasa na laülaashiikana na'aka na anoujashii judíokana, süka anain saa'in namüin sukuaippa tü tekirajakat anain na gentilekana, nnojoliishii

napüleeruain aa'in Tito súpüla o'yotoonaa ata.

<sup>5</sup> Wayouktüin súpüshua tü nachekakat wapüleerua na ekirajülikana sünain alawaa. Müleka kapüraleje waa'in shia, shiimüin sünain mojeerüin süküjia tü shiimüin waküjakat jümüin, tü nüchikikat chi O'tte'erüikai. Shia wachekaka súpüleerua lotüinjatüin tü nüchikikat Cristo waneepia jüpüla.

<sup>6</sup> Na laülaashiikana na'aka na anoujashii judiókana chakana Jerusalén, nnojoliishii neke'ejüin aa'in taya süchiirua ta'wanajaain tü tekirajakat anain na gentilekana. (Mayaashiije miyo'uin naya na'aka na judiókana, nnojotsü kasajatüin tamüin tia, süka nnojolin kachekala'atain wayuu Maleiwakai.)

<sup>7</sup> Nnojotsü na'wanajeein tü tekirajakat anain, süka natüjaaichipain taa'u sünain e'itaaushin taya nütüma Maleiwa súpüla aküjaa nüchiki chi O'tte'erüikai namüin na gentilekana, maa aka naa'in Pedro sünain e'itaaushin nütüma súpüla aküjaa shia namüin na judiókana.

<sup>8</sup> Tü kasa anasü naa'inrakat chi Maleiwakai sünain akaaliijaa Pedro, chi Aluwataaushikai namüin na judiókana, naa'inrüin shia tamü'inya, tayakai chi Aluwataaushikai namüin na gentilekana.

<sup>9</sup> Na laülaashii taashajaakana amaa so'u ka'ikat tia, Santiago, Pedro je Juan, na kojutkana natüma na anoujashii judiókana, nayaawatüitpa saa'u sünain aneekuushin taya nütüma Maleiwa súpüla tü a'yatawaakat. Namakalaka tamüin je nümüin Bernabé: "Acheküsü wanaawajiraain waa'in jümaa

sünain ji'yataain sa'aka tü gentilekalüirua oo'ulaka sünain wa'yataain sa'aka tü judiokalüirua".

<sup>10</sup> Shia'ala nachuntüin ne'e wamüin saa'u wamüliajüinjatüin tü anoujasükalüirua chakat Judea eekai müliain. Taa'inreein tia tayaka'iya.

*Achiajaanüshi Pedro nütüma Pablo saaliijee piain nu'upünaa*

<sup>11-12</sup> Shiasa süchikijee tia, antüshi Pedro yaamüin Antioquíamüin. Je wanaa sümaa een nia wamaa, ekaapü'üshi nia namaa na anoujashiikana eekai nnojoliin judiöin, mayaashijee achiajaanüin na judiökana suulia tia. Otta wanaa sümaa nantüin yaamüin yaa wane wayuuirua ajütüüshi nütüma Santiago chajee Jerusalénjee, o'ttüshi Pedro sünain akatalawaa yaawala'aya suulia ekawaa namaa na gentilekana. Mmotshi nia sheema ayoujünaa natüma na wayuu antapaatashiikana, na ekirajuushikana sünain anajirawaa nümaa Maleiwa sünainjee o'yotoonoo ata naajüin. Je süchikijee tia, tuchiajaain Pedro su'upala tü anoujasükalüirua saaliijee tü naa'inrakat, süka nnojolüin anain tü naa'inrakat saa'in tamüin.

<sup>13</sup> Wainma na judiökana yaaya ashatakana nukuaippa Pedro sünain piain nu'upünaa saaliijee mmolüin naya neema na laülaayuu judiökana. Otta ojutuushi Bernabé sünain aa'inraa tia'aya, ja'itairü nütüjaain saa'u sünain mojuin shia.

<sup>14</sup> Nnojotsü anain tü naa'inrakat na judiökana oo'ulaka Bernabé, je nnojotsü lotüin nakuaippa,

süka nnojolüin wanaawain sümaa tü shiimüin nüchikikat chi O'tte'erükai. Sünain tachiajaain Pedro saa'u nükatalaain suulia ekawaa namaa na gentilekana, müshi taya nümüin no'upala na anoujashiikana napüshua: “Ja'itaichi judíoia pia, oo'ulaaichipa pia suulia sukuaippa judío wanaa sümaa pikaain namaa na gentilekana. ¿Jamüshii juluwataaka'a na gentilekana sünain ashataa sukuaippa judío?”, tamakalaka nümüin Pedro.

15-16 Tamakalaka namüin napüshua na anoujashii judiókana eejanakana wamaa: “Waya judiókana, nnojoliwa'aya wanoujain nünain Cristo, saa'u saapünüin wamüin paala tü nüshajakat Moisés, a'waataapü'üshii waya sulu'u jemein sünain judíoia je sulu'u nnojolüin gentilein kaainjaralii waya. Wayaawatüitpa aa'u joolu'u sünain anajiraain wayuu nümaa Maleiwa, nnojotsü sünainjeejatüin aa'inraa tü nuluwataakat anain Moisés, alu'ujasa sünainjee anoujaa nünain Jesucristo. Je nüküjain wamüin Maleiwa sünain nnojolüin anajiraainjatüin wayuu nümaa sünainjee aa'inraa tü nuluwataakat anain Moisés. Je sükajee tia, anoujainapa wayakanaya nünain Jesucristo süka kachiiruain waa'in süpüla anajirawaa nümaa Maleiwa nünainjee Cristo, nnojotsü sünainjeejatüin tü nuluwataakat anain Moisés”.

17 Eesüja'a süpüla jümüin tamüin: “Wanaa sümaa wachajaain süchiki anajirawaa nümaa Maleiwa sünainjee anoujaa ne'e nünain Cristo, müleka nnojorule waa'inrüin tü nuluwataakat



anain Moisés, mojeerü sünüiki wayuu wamüin”, müshii jia tamüin. Otta tanüiki ji'ipajee: Nnojishi niain Cristo kaainjalain atüma wayuu. Süka jamüin, sünain nnojolüitpain ein waa'in sünain tü nüshajakat Moisés, nnojotsü kaainjalaain tia nu'upala Maleiwa.

<sup>18</sup> Akaajasa müleka woo'ulaale suulia wachajaain süchiki tü anajirawaakat nümaa Maleiwa nünainjee Cristo süpüla wachajaainjanain wachikua süchiki wane anajirawaa sünainjee aa'inraa tü nuluwataakat anain Moisés, shiimüin sünain kaainjaleenain waya sükajee tia.

<sup>19</sup> Süka tatüjaain saa'u tü nuluwataakat anain Moisés sünain nnojolüin anajiraain taya sütüma, müshi aka ouktakai taya suulia saa'u nnojolüin kasain saamüin tamüin süpüla anajirawaa nümaa Maleiwa. Je taashiichipa taya joolu'u süpüla taa'inrüinjatüin tü nüchekakat chi Maleiwakai tapüleerua.

<sup>20</sup> Müshi aka ouktiraakai taya nümaa Cristo wanaa sümaa nu'utünüin aa'in saa'u wane kuruusa. Nnojolüitpa jülüjain taa'in oonowaa sümaa nünüiki Moisés süpüla anajirawaa nümaa Maleiwa. Shia jülüjaka waneepia taa'in tü nüchekakat Cristo tapüleerua. Saa'u katüichipain no'u, eejeechi nia waneepia tamaa. Je süpüshua tü taa'inrakat, taa'inrüin sükajee tanoujain nünain Cristo, chi Nüchonkai Maleiwa, chi aikai apüla taya sümaa naapajiraain nikii süpüla ouktüin taa'ujee.

<sup>21</sup> Saa'u anamiashaatain chi Maleiwakai tamüin, müichia nnojolüin tayouktüin tü

naa'inrakat süpüla nu'tte'erüinjachin taya nukajee Cristo. Müichia nnojolüin tachajaain tachikua süchiki wane anajirawaa sünainjee aa'inraa tü nuluwataakat anain Moisés. Müleka wountüleje anajiraain waya sünainjee oonowaa sümaa tü nüshajakat Moisés, nnojoleerü kasain saapüin wamüin tü naa'inrakat Cristo sünain ouktüin nia waa'ujee.

### 3

*Tü anajirawaakat nümaa Maleiwa nünainjeejatü Cristo*

<sup>1</sup> Tawalayuwaa, jia chaje'ewaliikana Galacia, aisha'ajaa jia. Shiimüin sünain maa'in jaa'in. Ja'itairüja'aya taküjapü'üin jümüin tü shiimüinkat, tü nüchikikat Jesucristo sünain ouktüin saa'u kuruusa, ¿jamaka'a kapülaka'a joo jaa'in wane pütchi eekai nnojolüin shiimüin, tü naküjakat jümüin na ekirajülüikana sünain alawaa?

<sup>2</sup> Tasakirüin paala jia sünain wane kasa: ¿Kasa aapünaka anainjee jümüin chi Naa'inkai Maleiwa? ¿Shiataapa sünainjee jaa'inrüin tü nuluwataakat anain Moisés? Nnojo. Aapünushi nia jümüin sükajee jünoujain ne'e nüchiki chi O'tte'erükai aküjünakat jümüin.

<sup>3</sup> Je paala, jekennuuiwa'aya jia sünain anoujaa, jücheküin süpüleerua jükaaliijünüin nütüma chi Naa'inkai Maleiwa süpüla jaa'inrüinjatüin tü nüchekakat Maleiwa jüpüleerua. Otta müsia joolu'u, shiimüin sünain maa'in jaa'in süka juuntüin jaa'inrüin jümüiwa tü nüchekakat Maleiwa jüpüleerua saa'in jümüin.

<sup>4</sup> Soto jaa'in wanaa sümaa kachiiruapü'üin jaa'in akaaliijünaa nütüma chi Naa'inkai Maleiwa. ¿Eesü joolu'u süpüla nnojolüitpain kasain saamüin jümüin tü nükaaliijakat anain jia saa'in jümüin?

<sup>5</sup> Otta chi Maleiwakai, ¿kasa naapaka anainjee chi Naa'inkai jümüin? ¿Je kasa naa'inraka anainjee tü kasa anasükat ju'upala, tü nütüjakat apüleerua niakai nümüiwa? ¿Shiataapa sükajee jaa'inrüin tü nuluwataakat anain Moisés? Nnojo. Shia süka jünoujain ne'e nüchiki chi O'tte'erüikai aküjünakat jümüin.

<sup>6</sup> Soto jaa'in tü ashajünakat paala sulu'u tü karaloukta nüchikimaajatkat Maleiwa noo'opünaa Abraham, chi watuushikai wayakana judíokana. Müsü mayaa: “Nücheka achikit Maleiwa anajiraain Abraham nümaa sünaainjee nünoujain nünüiki”, müsü.

<sup>7</sup> Anakaja jiyaawatüle saa'u wane kasa: Waya anoujashiikana wapüshua, nüchooin ma'i waya Abraham, nnojotsü sünaainjeejatüin nuu'uliwo'uin waya, shia sünaainjee wanoujain nünain Maleiwa maa aka tü naa'inrakat paala Abraham.

<sup>8</sup> Je paala sümaiwa, aküjünüsü süchiki kasa anasü nütüma Maleiwa nümüin Abraham wainma juya süpülapünaa sülatüin tü aküjünakat achiki nümüin. Tü aküjünakat nümüin Abraham so'u ka'ikat tia, ashajünüsü süchikijee sulu'u tü nüchikimaajatkat Maleiwa. Shia tü nachikikat na gentilekana sünaain anajiraainjanain nümaa Maleiwa sünaainjee nanoujain nünain. Anuu nünüiki chi Maleiwakai

nümüin Abraham: “Shiimüin sünain kamaneejeechin taya sümüin wayuu sainküin mmakat süpüshua eekai sünoujain tanain maa aka pia”, müshi nümüin.

<sup>9</sup> Sütüma tü ashajuushikat, watüjaa aa'ulu sünain kamaneein chi Maleiwakai joolu'u sümüin wayuu süpüshua sünainjee tü sünoulakat, maa aka kamaneein paala nümüin Abraham sünainjee tü nünoulakat.

<sup>10</sup> ¿Jameechi chi wayuu eekai nüchajaain süchiki wane anajirawaa nümaa Maleiwa sünainjee aa'inraa tü nuluwataakat anain Moisés? Süka nnojolüin nuuntüin nikeraajüin süpüshua tü nümakat Moisés, shiimüin sünain kasalajaneerüin nümüin naainjala nütüma Maleiwa. Shia tü ashajünakat achiki paala sümaiwa sünain müin mayaa: “Süsaleerü nümüin naainjala chi wayuu eekai nnojolin naa'inrüin süpüshua'aya tü nuluwataakat anain Moisés”, müsü.

<sup>11</sup> Müshi taya tachikua jümüin: Nnojoishi anajiraain wane wayuu sünainjee oonowaa sümaa tü nümakat Moisés. Soto jaa'in tü ashajünakat achiki paala sümaiwa sünain müin mayaa: “Chi wayuu eekai nünoujain nünain Maleiwa, anaawashi nümaa kataiwa'aya no'u. Je ouktapa nia, ayatshi anaawain nümaa”.

<sup>12</sup> Chi eekai nüchajaain süchiki wane anajirawaa sünainjee tü nümakat Moisés, nnojotsü che'ojaain nümüin tü anoujaakat nünain Cristo saa'in nümüin, süka noonoin sümaa tü ashajuushikat münakat nümüin paala sünain maa: “Chi eekai naa'inrüin süpüshua tü nuluwataakat

anain Moisés, anaaweechi nümaa Maleiwa”, müsü.

<sup>13</sup> Otta tü tasakirakat anain joolu'u jia: ¿Jameechi chi eekai nnojolin naa'inrüin süpüshua tü nuluwataakat anain Moisés? Süsaleechi naainjala, ¿aashi müin? Müshi paala taya jümüin: Taashiinapa waya anoujashiikana nütüma Cristo suulia süsalainjanain waainjala, süka niaichipain süsalain waainjala nütüma Maleiwa. Shia tü ashajünakat achiki paala sünain müin mayaa: “Atüjaana aa'uchi chi eekai akachennüin sünain wane wunu'u sünain süsalaichipain naainjala nütüma Maleiwa”, müsü.

<sup>14</sup> Saa'u taashiinapain jia gentilekana nütüma Cristo suulia süsalainjanain jia jaainjala, jiyaawata aa'ut joolu'u sünain kamaneeichipain Maleiwa jümüin maa aka kamaneein nia paala nümüin Abraham. Je aapünüchipa chi Naa'inkai Maleiwa wamüin wapüshua sünainjee tü naa'inrakat Jesucristo. Shia tü nüküjakat achiki paala chi Maleiwakai sünain pansaain nünüiki.

*Tü nuluwataakat anain Moisés, shii'iyatüin wamüin waainjala*

<sup>15</sup> Tawalayuwaa, saa'u pansaain nünüiki chi Maleiwakai paala nümüin Abraham, nnojoleechi oo'ulaain Maleiwa suulia aa'inraa tü nümakat süpüla naa'inrüinjatüin. Maa aka sukuaippa wayuu süpüshua, müleka lotüle nünüiki wane wayuu soo'opünaa tü naa'inrüinjatkat, nnojotsü anain müleka nuu'ulaale suulia naa'inrüin tia. Je nnojotsü anain müleka nu'wanajaale

tü pütchi ni'itaakat paala sünain pansaain. Acheküsü nikeraajünjatün shia so'ujee tia.

<sup>16</sup> Tü pütchi nüküjakat paala chi Maleiwakai nümüin Abraham sünain pansaain nünüiki, nüküjain nümüin chi nuu'uliwo'uka'iya. Saashin tü ashajünakat sulu'u tü nüchikimaajatkat Maleiwa, nnojotsü aküjününin tü pütchikat namüin na nuu'uliwo'ukana napüşhua, alu'ujasa nümüin waneeshia ne'e chi nuu'uliwo'ukai, nia Cristo.

<sup>17</sup> Anuu tü taküjeekat joolu'u jümüin: Tü pütchi e'itaanakat nütüma Maleiwa sünain pansaain nünüiki nümüin Abraham, nnojotsü amalaje'ennünin sütüma tü nuluwataakat anain Moisés. Süka jamüin, aapünüsü tü nuluwataakat anain Moisés maa aka 430 juya süchikijee naashajaain Maleiwa nümaa Abraham.

<sup>18</sup> Ayatsia pansaain tü nümakat paala Maleiwa nümüin Abraham süpüla anajiraainjatün wayuu nümaa sünainjee anamiashaatain chi Maleiwakai namüin. Müleka anajiraaleje waya sünainjee aa'inraa tü nuluwataakat anain Moisés, nnojoleerüje kasajatünin wamüin tü nümakat chi Maleiwakai nümüin Abraham.

<sup>19</sup> ¿Kasa kapüla jatka tü nuluwataakat anain Moisés? Aapünüsü wainma juya nüchikijee Abraham süpüla shii'iyatünjatünin sümüin wayuu sünain shiimüin sünain aainjalaain tü kasa mojusü saa'inrakat. Nücheküin Maleiwa süpüleerua shikettaajününin sütüma wayuu tü nümakat Moisés sünainmüinre'eya nüntünin Cristo chi nuu'uliwo'ukai Abraham aküjünakai

achiki paala. Je sÿpÿla nikirajÿinjanain Maleiwa na wayuu Israelkana sÿnain tÿ nÿchekakat napÿleerua, nÿkÿjain shia nÿmÿin Moisÿs sÿpÿla mÿinjachin aka nia wane pÿtchipÿ'ÿ sÿnain nÿkÿjain tÿ nÿmakat Maleiwa namÿin na Israelkana. Je sÿpÿla ni'yataainjachin Moisÿs sÿnain tia, akaaliijÿnÿshi nia sÿtÿma wane aapieeirua chaje'ewat iipÿnaajee.

<sup>20</sup> Otta chi Maleiwakai sÿnain naashajaain paala sÿmaiwa nÿmaa Abraham, aashajaaji-raashi nÿmaa. Nnojoishi aashajaain nÿmaa nÿka wane pÿtchipÿ'ÿ.

<sup>21</sup> ¿Aapÿnÿsÿ tÿ nuluwataakat anain Moisÿs sÿpÿla sÿmalaje'erÿin tÿ nÿmakat paala Maleiwa sÿmaiwa nÿmÿin Abraham sÿnain pansaain nÿnÿiki nÿmÿin? Nnojo, nnojotsÿ aapÿnÿin sÿpÿla tia. Sÿka jamÿin, nnojotsÿ suuntÿin tÿ nÿmakat Moisÿs anajiraain wayuu sÿtÿma. Mÿleka anajiraaleje wane wayuu nÿmaa Maleiwa sÿtÿma aa'inraa tÿ aluwataanakat anain, anajiraainjatÿje wayuu sÿpÿshua sÿnainjee oonowaa ne'e sÿmaa tiairua.

<sup>22</sup> Ashajÿnÿsÿ sulu'u tÿ nÿchikimaajatkat Maleiwa sÿchiki wayuu sÿpÿshua sÿnain sÿchepchiain naya kaainjalaa. Otta chi eekai niyaawatÿin saa'u sÿnain nnojolÿin nuuntÿin anajiraain nia sÿnainjee tÿ naa'inrakat niakai nÿmÿiwa, taashishi nia sÿpÿla anoujaa nÿnain Jesucristo. Je tÿ kasa anasÿ akÿjÿnakat achiki paala sÿmaiwa nÿtÿma Maleiwa sÿnain pansaain nÿnÿiki, aapÿnÿsÿ maa'ulu yaa sÿmÿin wayuu sÿpÿshua eekai sÿnoujain

nünain Cristo.

<sup>23</sup> Wayakana, wayuu wapüşhua'aya süpülapünaa nüntüin Cristo süpüla wanoujainjanain nünain, kapüpu'üshii waya sütüma tü nümakat Moisés wane'ere'eya niweetapa Cristo süpüla anajiraainjanain waya nümaa Maleiwa nünainjee.

<sup>24</sup> ¿Kasapülatü tü nümakat Moisés? Süpülatü süntirüin waya nünainmüin Cristo süpüla anajiraainjanain waya sünainjee wanoujain nünain.

<sup>25</sup> Je joolu'u, saa'u anajiraainapain waya sünainjee tü wanoulakat, nnojoliinapa süpünaain waya tü nümakat Moisés.

### *Nüchonsü Maleiwa wayuu eekai sünoujain nünain Cristo*

<sup>26</sup> Jia wayuu jüpüşhua chakana Galacia eekai jünoujain nünain Jesucristo, nüchooinapa jia Maleiwa.

<sup>27</sup> Je wanaa sümaa sa'aniraain jukuaippa nümaa Cristo, müshii aka jia naa'in Cristo sünain anainapain no'ulu'u Maleiwa.

<sup>28</sup> Ja'itakaje judíoain jia oo'ulaka gentilein jia, ja'itakaje süchepchiain jia wayuu oo'ulaka laülaain jia jümüiwa, ja'itakaje tooloin jia oo'ulaka jieyuuin jia, müshii aka jia naa'in Cristo jüpüşhua no'ulu'u Maleiwa.

<sup>29</sup> Saa'u nüpüşhinapain jia Cristo, nuu'uliwo'u ma'i jia Abraham, je kamüinjeena jia nütüma Cristo tü kasa anasü nüküjakat achiki Maleiwa nüümüin Abraham sünain pansaain nüünüiki.



## 4

<sup>1</sup> Anuu tü taküjeekat jümün: Nüchon wane wayuu, aapümeerü nüpaala chi nüshikai nümün so'u wane ka'i. Otta müleka ayatayü'ire nia tepichin, müshi aka ne'e wane achepchiee süka maapujyülün nümün tü apaalaakat.

<sup>2</sup> Je sünain müin aka naa'in wane achepchiee, nnojoiishi laülaain nümüiwa. Aluwataanüshi natüma wane aa'inmajülii nia sümaa tü nuwashirüinkat chi nüshikai wane'ere'eya kettaain tü juya ni'itaakat paala chi nüshikai süpüla taashinjachin chi nüchonkai noulia.

<sup>3</sup> Aka'aya wayakana wapüshua süpülapünaa anoujaa nünain Cristo, süchepchiashii waya tü kasa shikirajakat anain wayuu manoujainsat.

<sup>4</sup> Otta chi Maleiwakai, keraapa tü ka'i nüneekatjütütkalia o'u paala süpüla nuluwataain chi Nüchonkai sa'akamün wayuu, nüjütün Cristo sünain wayuun nia je sünain noonoinja'a sümaa tü nuluwataakat anain Moisés, maa aka waya nüpüshikana judíokana.

<sup>5</sup> Ajütünüshi nia wamün süpüla taashinjanain waya suulia tü nuluwataakat anain Moisés. Nuluwataain chi Nüchonkai süpüla nüchooinjanain waya judíokana oo'ulaka jiakana gentilekana.

<sup>6</sup> Je saa'u nüchooinapain jia Maleiwa, ajütünüshi chi Naa'inkai jümün nütüma süpüla eenjachin nia sulu'u jaa'in. Je joolu'u, juuntün "Taatchee" jümünjanain nümüin Maleiwa, maa aka naa'in Cristo saa'u niain chi Nüchonkai.

<sup>7</sup> Nnojoliinapa joolu'u jia achepchieein, alu'ujasa nüchooinapa jia Maleiwa. Je saa'u

nüchooinapain jia, kamüinjeena jia nütüma wanaajiraa nümaa Cristo.

*Ashapataasü naa'in Pablo naalii na anoujashii-ikana*

<sup>8</sup> Je paala, nnojoliwa'aya ji'raajüin chi Maleiwakai, süchepchiashii jia tü maleiwayaasükalüirua ma'i.

<sup>9</sup> Otta müsia maa'ulu yaa, saa'u ji'raajüin nia je saa'u ni'raajüin ma'i jiakana, ¿jamüshii jia ju'ttaka'a jüchikua sünnain juushikajaain süchiirua tü shikirajakat anain wayuu manou-jainsat? ¿Keejiasü jümüin achepchiawaa jüchikua sütüma tia? Nnojoleena akaaliijünüin jia sütüma sünnain jaa'inrüin tü kasa anasü nüchekakat jüpüleerua Maleiwa.

<sup>10</sup> Taapa achikichii jia sünnain ju'ttüin sünnain jüshateein nakuaippa na judíokana, maa aka jeemeraain so'u sükalia neemeraakat o'u, maa aka jimi'ijaain so'u sükalia nemi'ijaakat o'u, maa aka jikaaain so'u sükalia nekaakat o'u. Jaa'inreein kasa eekai müin aka tia süpüla talatüinjachin Maleiwa jümaa jaajüin.

<sup>11</sup> Ashapalaasüle ma'i taa'in jaa'u. Kasa-taalejese nnojolüin sümalajaain tü ta'yataainkat ja'aka sünnain aküjaa nüchiki chi O'tte'erüikai.

<sup>12</sup> Tawalayuwaa, jütüjaa aa'uchi taya sünnain müichipain aka taya jaa'in jiakana gentilekana. Je sükajee tüü, tachüntüin joolu'u jümüin süka süpüshua taa'in shii'iree jüshatüin takuaippa sünnain nnojolüin suupünaain takuaippa tü nüshajanainkat Moisés. Mayaashiije kama-neein jia tamüin paala, nnojotsü anain tü

jaa'inreekat joolu'u tamüin sünain juu'ulaweein suulia tü anajirawaakat nünainjee Cristo.

<sup>13</sup> Soto jaa'in wanaa sümaa tantüin ja'akamüin palajana paala. Mayaainje tantüin sümaa ayuulii ja'akamüin, ayatshia taya aküjüin nüchiki chi O'tte'erüikai jümüin.

<sup>14</sup> Ja'itaichi nnojolin anain taya ju'upala saa'ujee tü ayuulii tanainjatkat, nnojoliishii e'rüliin wayumüin jia tamüin, nnojoliishii jime'erainpalain taya. Alu'ujasa, kamaneeshii jia tamüin müin aka tayakaije wane aapiee chajeejachikai iipünaajee, müin aka tayakaije Jesucristoin jümüin.

<sup>15</sup> Müleka tantüleje sümaa mo'uu ja'akamüin, eesüje süpüla jaakatüin tü jo'ukot süpüla ji'itaain tanain. Otta müsia joolu'u, ¿jamaka'aka nnojolüitpaka'a talatüin jaa'in tamaa?

<sup>16</sup> Saa'in tamüin, jü'ünüüichipa taya saaliijee taküjain tü shiimüinkat jümüin.

<sup>17</sup> Otta na ekirajülikana sünain alawaa, kee'ireesü naa'in jüüjüweein jia namüin shii'iree kojutüinjanain naya jütüma. Nacheküin süpüleerua jiyouktüinjatüin tü ekirajünakat anain jia tatüma, ja'itairü nnojolüin kasain saapüin jümüin tü nekirajeeekat anain nayakana.

<sup>18</sup> Müleka kojutüle jütüma wane wayuu eekai nükaaliijeein jia, anasü tia. Otta nnojotsü anain müleka kojutüle jütüma wane eekai nnojolüin shiimüin sünain nükaaliijeein jia. Je müshia tayakai, saa'u takaaliijeein jia waneepia, anakaja ayatüle kojutüin taya jütüma, mayaashije nnojolin jümaain taya maa'ulu yaa.

<sup>19-20</sup> Jia tachonnii aishiikana tapüla, nnojotsü

tatüjaain aa'u tü taa'inrajatkat jüka. Kee'ireesü taa'in to'unüin jünainmüin süpüla taashajaain-jachin jümaa süpüla tee'iyatüin jümüin sünnain mülo'uin jaalii tatüma. Maa aka wane wayuu jierü jemeyulüin sümaa süchon, aka'aya tayaka'iya sünnain müliain taya jaa'ujee shii'iree münnainain aka jia naa'in Cristo.

*Taashishii waya maa aka naa'in chi süchonkai Sara*

<sup>21</sup> Jia jüüjüweekana aa'in sümüin tü nu-luwataakat anain Moisés, tasakirüin paala jia sünnain wane kasa: Saa'u jiain gentilein, ¿shii'iree jiyawatüin saa'u tü shikirajakat anain tü nüshajakat Moisés?

<sup>22-23</sup> Soto jaa'in nüchiki Abraham ashajünakat paala sümaiwa nütüma Moisés, tü nachikikat na piamaashikana nüchooin. Chi wane, süchon süchepchia tü nu'wayuusekat. Jemeishi nia maa aka sukuaippa wayuu süpüshua. Otta chi wane'e, süchon Sara tü nu'wayuusekat. Nnojotsü achepchiaain shia sütüma wayuu. Mayaainge wainmain suuyase, kachonsü shia süka pansaain nünüiki Maleiwa paala sümüin je nümüin Abraham chi su'wayuusekai.

<sup>24-25</sup> Tü nüchikikat Abraham, aküjasü süchiki wane kasa, anuu shia: Na suu'uliwo'ukana tü süchepchiakat Sara, tü kanüliakat Agar, achepchiaashii naya maa aka shia. Akaajaa na wayuu jüüjüükana maa'ulu yaa sümüin tü nüshajakat Moisés shii'iree anajiraain nümaa Maleiwa sütüma, meena aka naya saa'in süchepchia wayuu, maa aka naa'in na judío

chaje'ewaliikana Jerusalén, je maa aka naa'in na wayuu aküjünakana amüin paala tü pütchi e'itaanakat nütüma Maleiwa, tü aapünakat nümüin Moisés saa'u tü uuchi kanüliakat Sinaí sulu'u tü mmakat Arabia. Je tü pütchi e'itaanakat nütüma wainma juya nüpülapünaa Moisés, tü aapünakat sümüin Sara oo'ulaka Abraham noo'opünaa chi nachoinjachikai, pansaasü shia'aya.

<sup>26</sup> Je joolu'u, müshii aka waya saa'in Sara sünain laülaain waya wamüiwa, süka taashi-inapain waya suulia aluwataanaa sütüma tü nümakat Moisés.

<sup>27</sup> Watüjaa aa'ut sünain nüchooin ma'i waya Abraham oo'ulaka Sara sütüma tü ashajünakat achiki paala. Müsü mayaa:

“Pia wayuu machonsotkot süka maralüin pia,  
ja'itairü nnojolüin kachooïn pia maa'ulu yaa,  
anakaja müleka talatüle pia süka süpüshua  
paa'in.

Ja'itairü ayouktünüitpain pia nütüma chi  
pu'wayuusekai,  
wainmeerü püchooinrua suulia wayuu eekai  
ka'wayuusein”.

<sup>28</sup> Soto jaa'in nüchiki Isaac, chi nüchonkai Abraham sümaa Sara, sünain jemein nia sünainjee pansaain nünüiki Maleiwa namüin. Akaajaa jia tawalayuwaa, müshii aka jia Isaac süka nüchooinapain jia Maleiwa sünainjee tü pütchi nüpansaajakat paala nümüin Abraham.

<sup>29</sup> Otta müshia chi süchonkai Agar, chi jemeikai maa aka wayuu ne'e, jashichishi nümüin Isaac, chi jemeikai sünainjee tü naa'inrakat chi

Naa'inkai Maleiwa. Akaajaa waya anoujashiikana maa'ulu yaa, müshii aka waya naa'in Isaac sünain jashichin wamüin na ekirajülüikana sünain alawaa.

<sup>30</sup> Otta tü anasukat süpüla waa'inrüin, aküjünüsü sulu'u tü karaloukta nüchikimaajatkat Maleiwa. Anu'usa nünüiki chi Maleiwakai nümüin Abraham:

“Püjüta puulia tü achepchieekat nümaa chi süchonkai, süka nnojölüin niainjachin aapaain tü taapüinjatkat pümüin.

Niainjachi aapaaka chi süchonkai Sara”.

<sup>31</sup> Müshi taya tachikua jümüin tawalayuwaa: Saa'u nnojoliinapain suupünaain waya tü nuluwataakat anain Moisés, nnojoliishii waya müin aka naa'in chi süchonkai Agar, tü achepchieekat. Müshii aka waya naa'in chi süchonkai Sara sünain taashiinapain waya süpüla oonowaa sümaa nünüiki Maleiwa.

## 5

### *Tü taashika apüla waya anoujashiikana*

<sup>1</sup> Taashiinapa waya sütüma tü naa'inrakat Cristo sünain ouktüin waa'ujee süpüla nnojoliinjanain kachepchiain waya wane kasa. Je sükajee tia, anakaja joolu'u müleka jüchecherüle jaa'in nünain Cristo süpüla nnojoliinjanain suupünaain jia kasa eekai müin aka shia jüchikua.

<sup>2</sup> Ee jümaala jaa'in sünain tü taküjainjatkat jümüin, süka shiimüin sünain ajütüüshin taya nütüma Maleiwa. Müleka ji'yote'erüle jüta süka

jüchajaain süchiki wane anajirawaa sünainjee tü nümakat Moisés, atüjaaneena aa'u jia sünain jiyouktüin tü naa'inrakat Cristo süpüla anajiraainjanain jia nümaa Maleiwa.

<sup>3</sup> Müshi taya tachikua: Chi wayuu eekai ni'yote'erüin nüta shii'iree anajiraain nümaa Maleiwa, acheküshi noonoin sümaa süpüshuale'eya tü nuluwataakat anain Moisés.

<sup>4</sup> Müleka jüchajaale süchiki wane anajirawaa sünainjee tü nüshajakat Moisés, akatalaainapaja'a jia nuulia Cristo sükajee tia, süka nnojolüitpain kasajatüin jümüin tü kasa anasü naa'inrakat Maleiwa sünainjee anamiain nia jümüin.

<sup>5</sup> Akaajasa wayakana, watüjaa aa'ulu sünain anajiraainapain waya nümaa Maleiwa sünainjee tü wanoulakat nünain Cristo sümüiwa. Je akaaliijünüshii waya nütüma chi Naa'inkai Maleiwa süma'inru'u wa'atapajüin keraainjatüin süpüshua tü naa'inrüinjatkat wapüla Maleiwa.

<sup>6</sup> Tü nüchekakat chi Maleiwakai wapüleerua waya anoujashiikana nünain Cristo, shia müleka aijiraale waya wapüla sükajee wanoujain nünain. Nnojotsü kasajatüin nümüin müleka wo'yotoonüle ata je müleka mo'yotoojule.

<sup>7</sup> Aisha'ajaa jia. Achecherapü'üshii jia jaa'in sünain anoujaa. Otta müsia joolu'u, oo'ulaainapa jia suulia joonoin sümaa tü shiimüinkat tekirajakat anain jia. ¿Jaraliyuu oo'ule'etka jia suulia anoujaa?

<sup>8</sup> Nnojoishi niain Maleiwa oo'ule'erüin jia, süka niain eenaküin jia süpüla anoujaa.

9 Mayaasüje palirüin ne'e tü pütchi alawaa aküjünakat jümüin, wainma ma'i tü anoujasükalüirua ja'aka eekai suu'ule'ennüin suulia tü shiimüinkat süpüla suushikajaain süchiirua alawaa.

10 Otta saa'u sa'aniraaipain jukuaippa nümaa chi Senyotkai, tatüjaa aa'uchii jia sünain ayatüinjanain kache'ein waneepia sünain tü shiimüinkat. Je na ekirajüliikana jia sünain tü alawaakat, mayaasüje nnojolüin tatüjaain saa'u jaraliin naya, shiimüin sünain süsaleenain naya tü naainjalakat.

11 Tawalayuwaa, müleka tekirajüleje jia sünain o'yotoonoo ata, nnojoleerü mojuin namüin na judiökana nüchiki Jesús sünain ouktüin saa'u kuruusa. Je nnojoleerü e'rüliin wayumüin naya tamüin.

12 Je na ekirajüliikana sünain alawaa, aisha'ajaa, kasataalejese nakatalaain ja'akajee.

13 Tawalayuwaa, eenakünüshii jia nütüma Maleiwa süpüla taashinjanain jia suulia supünaajüin tü nüshajakat Moisés. Nnojoliishii jia taashin süpüla kale'eru'uin süchiki kaainjalaa. Shia taashika apüla jia, jükaaliijiraain süka aijiraain jia jüpüla.

14 Anuu tü nuluwataakat anain Moisés, tü alana'aleekat sünain anain sa'akajee tü aluwataanakat anain waya. Müsü mayaa: "Anakaja müleka aire püpüla wayuu süpüshua, maa aka alin pia püpülaajiraa", müsü.

15 Jalia jia suulia a'ülüjaajirawaa. Müleka masütaajule jia sünain e'rüliin wayumüin namüin na juwalayuukana, amalajaajeerü tü



jünoulakat sükajee tia.

*Nukuaippa chi wayuu jüüjüükai nümüin chi Naa'inkai Maleiwa*

<sup>16</sup> Tamüshii paala jia: Suulia kale'eru'uin jia süchiki kaainjalaa, anakaja müleka jüüjüüle jia waneepia nümüin chi Naa'inkai Maleiwa.

<sup>17</sup> Tü kasa mojusü keejiakat nümüin chi eekai kale'eru'uin süchiki kaainjalaa, naata suulia tü nüchekakat chi Naa'inkai Maleiwa. Je tü kasa anasü keejiakat nümüin chi eekai jüüjüün nümüin chi Naa'inkai Maleiwa, wane sümüin suulia tü naa'inreekat chi eekai kale'eru'uin süchiki kaainjalaa. Tü naa'inreekat chi wane'e, naata suulia tü naa'inreekat chi wane'eya. Müleka kale'eru'uin jia süchiki kaainjalaa, iseerü jüchiki jaa'inrüin tü nüchekakat Maleiwa jüpüleerua.

<sup>18</sup> Otta müleka jüüjüüle jia nümüin chi Naa'inkai Maleiwa, nnojoleena suupünaain jia tü nümakat Moisés.

<sup>19</sup> Atüjaana aa'ulu sütüma wayuu süpüshua tü naa'inrakat chi eekai kale'eru'uin süchiki kaainjalaa. Naa'inrüin tü mojusukat: maa aka a'luwajirawaa akuaippaa sümaa wayuu jierü otta wane jierü nümaa wane toolo,

<sup>20</sup> maa aka kamaleiwaseyaain nia, maa aka ee'irajiraa ouutsü, maa aka kanainwaa aa'in wayuu, maa aka a'ülüjaajirawaa, maa aka achumujaa aa'in, maa aka ülü'üttaa aa'in, maa aka yaletayaa aa'in su'upala wayuu, maa aka akatajirawaa,

<sup>21</sup> je maa aka eperuwawaa. Chi eekai aa'inrüin kasa eekai müin aka tia, müichia

nnojolin ekerolüin nüma'anamüin Maleiwa eere nuluwataain. Shia tü tamapü'ukat paala jümüin.

<sup>22</sup> Otta jiakana, ¿jameena jia müleka jüüjüüle jia nümüin chi Naa'inkai Maleiwa? Shiimüin ma'i akaaliijüneena jia nütüma süpüla aijiraain jia jüpüla, je talateerü jaa'in mayaasüje ji'reerüin müliaa. Je su'unnaa tü müliaa ji'reetkat, eimalaajeerü jaa'in nütüma. Je atüjeena jia a'atapajaa mayaainje nnojolüin jaa'a müin wayuu jümüin. Kamaneejeena jia sümüin wayuu süpüshua sümaa aa'inraa tü kasa anasukat waneepia sümüin. Je jikettaajeerü waneepia tü e'itaanakat jüpüla.

<sup>23</sup> Anamieena jia sümüin wayuu eekai jashichin jümüin. Je jüchereerü jaa'in suulia aa'inraa kasa mojusü süka laülaain jaa'in. Meeria jukuaippa müleka jüüjüüle jia waneepia nümüin chi Naa'inkai Maleiwa. Je nnojoleerü jaralüin laülaain jaa'u, tü achiajaainjanakat jia suulia aa'inraa tia.

<sup>24</sup> Chi eekai sa'aniraain nukuaippa nümaa Jesucristo, saa'ujee müin aka ouktiraakai nia nümaa, nnojotsü naa'inrüin tü kasa mojusü keejiapü'ukat nümüin, süka nnojolichipain kale'eru'uin süchiki kaainjalaa.

<sup>25</sup> Maa aka waluwataanüin joolu'u nütüma chi Naa'inkai Maleiwa, anakaja woonoole sümaa tü nümakat wamüin.

<sup>26</sup> Anakaja nnojorule alaayaain waa'in suulia wayuu sünain kasakaaraliin woo'omüin a'ülüjawaa je sünain wachunjiraain saa'u eekai een.

## 6

### *Akaaliijaa wayuu süpüshua*

<sup>1</sup> Tawalayuwaa, jiakana jüüjüükana nümüin chi Naa'inkai Maleiwa, müleka kaainjarale wane juwala, anashii müleka jime'ejüle naa'in süpüla nujuittinnüinjachin suulia tü kaainjalaakat. Je wanaa sümaa jükaaliijain nia, ayata jia ka-maneein nümüin. Kaainjalajayaa jia wanaa nümaa.

<sup>2</sup> Anakaja müleka jükaaliijiraale wane'ewai jukua su'unnaa tü müliaa ji'rakat, süpüla jiker-aajüinjatüin tü nüchekakat Cristo jüpüleerua.

<sup>3</sup> Je nnojotsü anain müleka yaletayaale jukuaippa su'upala wayuu. Nnojo motüin jaa'in sünnain che'ojaain akaaliijirawaa jümüin.

<sup>4</sup> Anakaja eere jaa'in sünnain tü jaa'inrakat süpüla jütüjaainjatüin saa'u müleka anale je müleka mojule. Maa aka analeje'e tü jaa'inrakat, talateeshiija'a jia sümaa. Je nnojolu jiyou-jireerüin tü jaa'inrakat namaa juwalayuu.

<sup>5</sup> Jütüjaa saa'u wasouktinneenain wane'ewai wakua nu'upala Maleiwa so'uweena wane ka'i saa'u süpüshua tü waa'inrakat, müleka anale, müleka mojule.

<sup>6</sup> Na ekirajünakana sünnain nünüiki Maleiwa, anakaja naapawaire süpüshi tü kasa eekat nama'ana nümüin chi ekirajakai naya.

<sup>7</sup> ¿Kaseerü naa'inraka chi Maleiwakai nümüin chi wayuu mache'ekai süchiirua tü mojusukat? ¿Nnojoleerü cheje eera jamajatüin nümüin? Jamüsüja'a shia, jülüjeerü naa'in süpüshua. Chi aa'inrakai tü kasa anasukat, walaajechi

nütüma. Otta chi aa'inrakai tü kasa mojusukat, nnojoleechi walaain nütüma.

<sup>8</sup> Chi wayuu eekai ayatüin sünain kale'eru'uin süchiki kaainjalaa, oukteechi nia saaliijee tia. Otta chi aa'inrakai tü nüchekakat chi Naa'inkai Maleiwa, ee'iranajaaneerü naa'in nütüma süpüla eenjachin nia nümaa Maleiwa süpüla ka'ikat süpüshua.

<sup>9</sup> Je sükajee tia, anakaja makulajaainre waa'in sünain aa'inraa tü anasukat sümüin wayuu. Müleka ayatüle waya sünain tia, walaajeena waya nütüma chi Maleiwakai so'uweena wane ka'i.

<sup>10</sup> Müleka watüjaale saa'u tü anasukat süpüla aa'innaa, anakaja waa'inrüle tia namüin na wawalayuukana palajana je mapa sümüin wayuu süpüshua.

*Achiajaashi Pablo nüchikua noulia na eki-rajülüikana sünain alawaa*

<sup>11</sup> Ja'apü süshajia tatüma tü karalouktakat süka tayain kashajalain tü pütchi taküjüinjatkat joolu'u jümüin.

<sup>12</sup> Anuu joo tanüiki tachikua jümüin: Jalia jia suulia juushikajaain nachiiirua na wayuu aluwataakana sünain o'yotoonaa ata. A'waataashii naya sulu'u tü nekirajakat anain süpüla kojutüinjanain naya sütüma wayuu. Müleka nnojoliireje nekirajüin sünain tia, mojutsaliije naya natüma na judíokana sünainjee tia.

<sup>13</sup> Na wayuu eekai o'yotoonüin ata, nnojoliishii ainküin oonowaa sümaa tü nuluwataakat anain Moisés. Shia kee'ireeka naa'in ne'e

shi'yotoonüinjatüin jüta jiakana süpüla na'waataainjanain sulu'u jüüjüüin jia sümüin tü nekirajakat anain.

<sup>14</sup> Otta tayakai, kasataalejese nnojolin ta'waataain sulu'u takuaippa. Shia ta'waataainjatka alu'u nukuaippa chi Wasenyotsekai Jesucristo, süka ouktüin nia saa'u taainjala. Je sükajee tia, müichipa aka ouktiraakai taya nümaa sünain nnojolüitpain kasajatüin tamüin tü keejiakat sümüin wayuu manoujainsat. Je süka anajiraachipain joolu'u taya nümaa Maleiwa sünainjee tü naa'inrakat Cristo, nnojolichipa kasajachin taya sümüin tü wayuu manoujainsatkalüirua.

<sup>15</sup> Nnojoliishii waya kojutüin nütüma Maleiwa sünainjee sukuaippa wata, müleka shi'yotoonüle otta mo'yotoojule. Shia nüchekaka wapüleerua su'wanajaanüinjatüin wakuaippa nütüma.

<sup>16</sup> Jia a'wanajaainapakana akuaippa nütüma Maleiwa, gentilekana oo'ulaka judiókana, saa'u jüüjüüin jia sümüin tü tekirajakat anain, achuntüshi joo taya nüümüin Maleiwa süpüla nüümüiajüinjanain jia je süpüla naapüinjatüin anaa jümüin.

<sup>17</sup> Je joolu'u süka keraaitpain tü tashajakat jümüin, müshi paala taya namüin na eekai e'rülüin wayümüin tamüin: Kettshia taya. Taya'a nuhepchiaka Cristo je kamojulashi taya sünainjee aküjaa nüchiki.

<sup>18</sup> Tawalayuwaa, achuntüshi joolu'u taya nüümüin chi Wasenyotsekai Jesucristo süpüla

nii'iyatüinjatüin na'anasia waneepia jümüin.  
Amén, kasataalejese nikeraajüin tia.

**Tü nüchikimaajatkat Jesucristo  
Wayuu: Tü nüchikimaajatkat Jesucristo New  
Testament**

copyright © 2010 Wycliffe Bible Translators, Inc.

Language: Wayuu

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 28 Dec 2024 from source  
files dated 29 Jan 2022

dcbb0234-8491-58d2-b1da-acba92db0647